

Plenchi

Bèl a bati

Nos a pidi awaseru, el a kontestá mesora. Esta dushi no. Paranan ta kontentu, matanan ta hari i mesora nan a kuminsá bona. Tata danki pa e awa pa asina laba i limpia tur stòf i trese bonansa.

E dianan aki subi plenchi ku dak, paso un ora pa otro bo por haña un baño di awa. Sali prepará pa bo no mester zundra e awa ku a kue bo di sorpresa. No zundre, tumé komo un bendishon i prepará pe. Ora ta kalor nos ta roga pa awa, ora awa kai nos ta lamentá e molester. Ta asina ta hende semper nos tin algu kontra. Ban selebrá bida ku gratitut pa tur loke bida duna nos. Si e duna nos lamunchi, traha awa di lamunchi pa bo i bo yunan. Si e pone piedra den bo kaminda, usa e piedranan pa bo traha kaminda, kas of sera bo kurá. Bida no ta fásil pero semper bo tin un eskoho di sigui dal bai positivo òf hunga víktima i sinta lamentá mientras tempu ta kore bai.

Riba plenchi nos a pone un dak pa bo pa wanta solo i awa. Nos a prepará potret i informashon pa bo relahá i disfrutá. Danki pa ta huntu ku nos riba nos plenchi. Paso ta di nos e ta, si bo no tei nos plenchi ta sinti bo falta sigur. Abo ta importante pa nos. Un felis wikènt yen di trankilidat i goso.

Riba roster

- 10 november deliberashon ku mayornan di RK i hóbennan riba plan di maneho 2016-2020**
- 24 november deliberashon ku personal di RK riba plan di maneho 2016-2020**

Orashon

Harmami ku bo harnas di protekshon Señor.

Moldia mi kurason den relashon ku otronan.

Dunami sabiduria pa ta hustu Señor ku mi mes i ku otronan.

Tene mi man Señor, tur momento.

Pordonami tur mi fayonan, Señor.

Señor, yudami subi e kaminda rekto semper bai.

Amen.

Not'é riba bòrchi

Tim di maneho di tantu VSBO, HavoVWO i SBO diskutiendo riba plan di maneho nobo pa RK. Tur miembro aktivamente a deliberá riba konkretisashon di e plan di maneho nobo 2016 pa 2020.





Den agènda

- **Fakansi**
21 desèmber 2015 pa 3 yanuari 2016

Mi ta konta

Pagá ku un glas di lechi.

Gustavo tabata kana tur siman bende ensiklopedia porta pa porta pa asina e por paga su skol. Un dia el a kana asina tantu sin kome, ku e no por a kasi para riba su pia. El a disidí ku na e próksimo porta e lo pidi algu di kome. Ora el a bati na porta, un damsita a habri e porta i keda wak e ku dos wowo grandi bibitu. El a pèrde kurashi i a disidí di djis pidi pa un poko awa, mientras el a muestra su ensiklopedianan na benta. E damsita a bai bin bèk ku un glas di lechi pa Gustavo. Gustavo a bebe esaki gradisidu i pensando kon e ta hasi paga pa esaki.

Ora el a kaba el a puntra e hóben kiko e mester duné pa e glas di lechi. E hoben a kontesté: “Mi mama a siñami pa no kobra ni spera pago pa akto di bondat.”

Nunka Gustavo a lubidá e palabranan te hasta despues ku el a bira un dòker renombrá.

Un 15 aña despues, na su klínika, a drenta un señora hopi malu pa muri. Nan a trese di un otro pueblo pa wak si aki si por a hasi algu pa skapé. Ora Gustavo e tende di kua pueblo e señora ta bin, el a keda kontentu ku ta di su pueblo natal.

Mesora el a tuma e fail pa studia i a bai presentá su mes na e señora. Ora el a yega el a keda sorprendé di mira ku ta e hóben ku tantu aña pasa a regalé un glas di lechi. El a tuma riba su mes pa traha personalmente duru riba e kaso aki. Despues di un lucha di lunas el a logra kura e señora. E ultimo dia e señora tabata spera su resibo, e tabata sa ku pa bida largu e ku su yunan lo mester bai paga e resibu aki. Grandi tabata su sorpresa ora el a mira te abo riba e resibu: Pagá komplemento pa bo bondat di regalá un hóben hambriente un glas di lechi.

Prenchi



Un prenchi pa tur ku a kumpli aña den luna di október na Kolgeio Maria Auxiliadora



Un prenchi pa St. Margaretha College ku su Margamunchi Purunchi Ice.

Mucha djispou

Paul, un hóben ku a kaba di haña su título di dòktòr a subi un boto chikí di motor pa bai di st. Maarten pa Saba.

E hóben aki a puntra e doño di e boto, Samuel, un skat di preguntá: “Bo a bai skol, bo sa lesa i skibi? Bo sa di atanomia, geografia, ekologia of sikologia?”

Riba tur pregunta Samuel a kontestá negativo.

Paul: “bon ta kiko bo sa anto? Ta nada nada mes bo no sa.”

E boto a kuminsá sink i Paul a bira tur nervioso.

Samuel: “bo sa di landalogia i skapatologia di tribonologia?”

Paul: “no, mi no sa nada di e kosnan ei.”

Samuel: “Awel tribonologia lo kome bo kurpalogia anto lo bo siña konosé murilogia pa motibu di bo bokalogia.”